

Կանոնակարգ

Հայաստանի Հանրապետության և Ադրբեջանի Հանրապետության միջև
պետական սահմանի սահմանազատման և սահմանային անվտանգության
հարցերով հանձնաժողովի

ու

Ադրբեջանի Հանրապետության և Հայաստանի Հանրապետության միջև
պետական սահմանի սահմանազատման պետական հանձնաժողովի
համատեղ գործունեության մասին

Հաշվի առնելով, որ Հայաստանի Հանրապետության և Ադրբեջանի
Հանրապետության միջև պետական սահմանի սահմանազատման և սահմանային
անվտանգության հարցերով հանձնաժողովն ու Ադրբեջանի Հանրապետության և
Հայաստանի Հանրապետության միջև պետական սահմանի սահմանազատման
պետական հանձնաժողովը ստեղծվել են Հայաստանի Հանրապետության և
Ադրբեջանի Հանրապետության միջև պետական սահմանի սահմանազատումն
իրականացնելու նպատակով,

Նշելով, որ Հանձնաժողովները կհիմնվեն Ալմա-Աթայի 1991 թվականի
հռչակագրի վրա՝ որպես Հայաստանի Հանրապետության և Ադրբեջանի
Հանրապետության միջև պետական սահմանի սահմանազատման գործընթացի
հիմնարար սկզբունք (եթե հետագայում Հայաստանի Հանրապետության և
Ադրբեջանի Հանրապետության միջև խաղաղության և միջպետական
հարաբերությունների հաստատման մասին համաձայնագրով կնախատեսվեն այլ
կարգավորումներ, ապա տվյալ հիմնարար սկզբունքը կհամապատասխանեցվի վերը
նշված համաձայնագրով սահմանված սկզբունքներին),

Պայմանավորվեցին հետևյալի մասին.

Հոդված 1

1. Սույն Կանոնակարգով կարգավորվում է Հանձնաժողովների համատեղ
գործունեությունը: Հանձնաժողովների նիստերի և համատեղ աշխատանքային
հանդիպումների կազմակերպման և անցկացման կարգը կարգավորվում է
Հայաստանի Հանրապետության և Ադրբեջանի Հանրապետության
Կառավարությունների կողմից հաստատված Աշխատակարգով:

Մ. Գ.

Տ. Մ.

2. Ելնելով անհրաժեշտությունից՝ Հանձնաժողովներն իրենց աշխատանքներում ներգրավում են փորձագետների և մասնագետների:

Հոդված 2

1. Սահմանազատման գործընթացում Հանձնաժողովներն օգտագործում են բոլոր վերաբերելի քարտեզագրական փաստաթղթերը, ինչպես նաև բոլոր նորմատիվ իրավական և իրավաբանորեն հիմնավորված այլ փաստաթղթերը:

2. Հանձնաժողովները համաձայնեցված կազմակերպում և վերահսկում են տիեզերալուսանկարահանման և օդալուսանկարահանման, գեոդեզիական, կադաստրային և քարտեզագրական աշխատանքների իրականացումը, տեղանքում սահմանագծի անցման հատվածների տեղազննման և հետազոտման աշխատանքների կատարումը, ինչպես նաև սահմանազատման իրականացման հետ կապված այլ աշխատանքների կատարումը (*այսուհետ՝ սահմանազատման աշխատանքներ*):

3. Սահմանազատման աշխատանքների կատարման ընթացքում Հանձնաժողովների միջև ազգային օրենսդրություններով սահմանված կարգով իրականացվում է համապատասխան տիեզերալուսանկարահանման և օդալուսանկարահանման, քարտեզագրական և գեոդեզիական նյութերի փոխանակում՝ սույն Կանոնակարգի 5-րդ հոդվածով սահմանված պետական սահմանի սահմանազատման քարտեզի (*այսուհետ՝ սահմանազատման քարտեզ*) ստեղծման նպատակով:

4. Հանձնաժողովները մշակում, համաձայնեցնում և ընդունում են հետևյալ փաստաթղթերը՝

1) սահմանազատման փորձագիտական խմբերի աշխատանքի կարգի մասին ուղեցույցը.

2) սահմանազատման քարտեզի ստեղծման մասին ուղեցույցը.

3) սահմանազատման քարտեզի վրա հայկական աշխարհագրական անվանումներն ադրբեջաներենով և ադրբեջանական աշխարհագրական

Մ.Գ.

Տ.Մ.

անվանումներն հայերենով արտացոլելու կարգի մասին ուղեցույցը.

4) պետական սահմանագծի անցման արձանագրություն-նկարագրություն կազմելու կարգի մասին ուղեցույցը.

5) սահմանագատման փաստաթղթերի ձևակերպման և հրատարակման կարգի մասին ուղեցույցը:

5. Սույն հոդվածի 4-րդ կետում նշված փաստաթղթերի ճշգրիտ անվանումները կհամաձայնեցվեն Հանձնաժողովների աշխատանքի ընթացքում:

6. Անհրաժեշտության դեպքում՝ Հանձնաժողովների համաձայնությամբ, ի լրումն նշված փաստաթղթերի կազմվում են այլ ուղեցույցներ և կանոններ:

Հոդված 3

1. Սահմանագատման ընթացքում Հանձնաժողովները՝

1) ձևավորում են սահմանագատման փորձագիտական խմբեր, որոնք տեղանքում իրականացնում են սահմանագատման համալիր միջոցառումներ, և աշխատանքների արդյունքներով կազմվում են փաստաթղթեր՝ Հանձնաժողովներին ներկայացնելու համար.

2) իրականացնում են սահմանագատման փորձագիտական խմբերի գործունեության ղեկավարումն ու վերահսկողությունը.

3) ուսումնասիրում, ստուգում և ընդունում են սահմանագատման փորձագիտական խմբերի կողմից ներկայացրած փաստաթղթերը.

4) իրենց իրավասությունների շրջանակներում իրականացնում են սույն Կանոնակարգի պատշաճ կատարումն ապահովելու համար անհրաժեշտ այլ լիազորություններ:

2. Սահմանագատման աշխատանքներն իրականացվում են պարիտետային հիմունքներով: Ընդ որում՝ յուրաքանչյուր Հանձնաժողով ծախսերը հոգում է ինքնուրույն: Հատուկ դեպքերում ծախսերի հարցը ենթակա է առանձին համաձայնեցման:

Մ. Գ.

Տ. Մ.

Հոդված 4

Սահմանազատման աշխատանքներն իրականացնելիս Հանձնաժողովները կարող են դիտարկել սահմանագծի անցման օպտիմալացման հնարավորություններ և համաձայնեցնել գործընթացի չափանիշներն ու ձևերը հետևյալ նպատակներով՝

- 1) սահմանամերձ բնակավայրերի անվտանգության ապահովում.
- 2) սահմանամերձ տարածքների բնակիչների համար իրենց ավանդական տնտեսական գործունեության համար պայմանների ստեղծում.
- 3) ինժեներական, էներգետիկ, տրանսպորտային, մելիորացիոն և այլ ենթակառուցվածքների անդրսահմանային օբյեկտների, արգելոցների, ազգային պարկերի գործունեության ապահովում, էկոլոգիական և բնապահպանական գործունեության պահպանում, ինչպես նաև ջրային ռեսուրսների օգտագործում.
- 4) պաշտամունքային նշանակության օբյեկտների, գերեզմանատների, մշակութային և պատմական ժառանգության պահպանություն.
- 5) ոլորապտույտ գծերի ուղղում.
- 6) սահմանագծի անցում բնական աշխարհագրական օբյեկտներով և ռելիեֆի տարրերով:

Հոդված 5

1. Սահմանազատման աշխատանքները Հանձնաժողովներն իրականացնում են սահմանագծի առանձին համաձայնեցված հատվածներով/հատվածամասերով: Յուրաքանչյուր այդպիսի հատվածի/հատվածամասի համար կազմվում է սահմանագծի անցման նկարագրություն, որը մինչև սահմանազատման գործընթացի ամբողջական ավարտը կհամարվի համաձայնեցված:

2. Սահմանազատման համալիր աշխատանքների կատարման արդյունքներով Հանձնաժողովները կազմում են ամբողջ պետական սահմանագծի անցման Արձանագրություն-նկարագրությունը և դրան կից հետևյալ փաստաթղթերը՝

- 1) 1:25000 մասշտաբի սահմանազատման քարտեզը (փոխադարձ համաձայնությամբ սահմանագծի որոշ հատվածների համար հնարավոր է 1:10000

Մ. Գ.

Տ. Մ.

մասշտաբի և ավելի խոշոր մասշտաբի սահմանազատման քարտեզի ստեղծումը)։

2) համաձայնեցված սահմանազատման քարտեզի վրա արտացոլված սահմանագծին համապատասխան կազմված՝ հայ-ադրբեջանական պետական սահմանագծի անցման անալիտիկ կոորդինատների կատալոգը։

3) Հանձնաժողովների աշխատանքի վերաբերյալ եզրափակիչ արձանագրությունը։

3. Պետական սահմանագծի անցման Արձանագրություն-նկարագրությունը, ինչպես նաև դրա հավելվածները կազմվում են հայերեն, ադրբեջաներեն և ռուսերեն ու ստորագրվում Հանձնաժողովների նախագահների կողմից։

4. Պետական սահմանագծի անցման Արձանագրություն-նկարագրությունը և դրա հավելվածները՝ հանդիսանալով Հայաստանի Հանրապետության և Ադրբեջանի Հանրապետության միջև պետական սահմանի մասին պայմանագրի բաղկացուցիչ մասը, ուժի մեջ են մտնում այդպիսի պայմանագրի ստորագրումից և դրա՝ անհրաժեշտ ներպետական ընթացակարգերն անցնելուց հետո։

5. Անհրաժեշտության դեպքում, ի լրումն սույն հոդվածի 2-րդ կետում նշված փաստաթղթերի, կարող են ավելացվել նաև սահմանազատման համալիր աշխատանքների կատարման ընթացքում պատրաստված այլ նյութեր։

Հոդված 6

Փոխադարձ համաձայնությամբ սույն Կանոնակարգում կարող են կատարվել փոփոխություններ և լրացումներ, որոնք ձևակերպվում են սույն Կանոնակարգի անբաժանելի մասը կազմող արձանագրություններով և ուժի մեջ են մտնում սույն Կանոնակարգի 7-րդ հոդվածին համապատասխան։

Հոդված 7

Սույն Կանոնակարգն ուժի մեջ է մտնում Հայաստանի Հանրապետության և Ադրբեջանի Հանրապետության կողմից դրա ուժի մեջ մտնելու համար անհրաժեշտ բոլոր ներպետական ընթացակարգերն ավարտելու մասին վերջին գրավոր ծանուցումը ստանալու օրը և գործում է մինչև սահմանազատման աշխատանքների ամբողջական ավարտը։

Մ. Գ.

Տ. Մ.

Ստորագրված է 30 08 2024 թվականի, երկու բնօրինակից՝
յուրաքանչյուրը՝ հայերեն, ադրբեջաներեն և ռուսերեն, ընդ որում բոլոր տեքստերը
հավասարազոր են: Սույն Կանոնակարգի մեկնաբանման հետ կապված
տարաձայնություններ առաջանալու դեպքում կիրառվում է ռուսերենով կազմված
տեքստը:

Հայաստանի Հանրապետության և
Ադրբեջանի Հանրապետության
միջև պետական սահմանի
սահմանազատման և սահմանային
անվտանգության հարցերով
հանձնաժողովի նախագահ



Ադրբեջանի Հանրապետության և
Հայաստանի Հանրապետության միջև
պետական սահմանի սահմանազատման
պետական հանձնաժողովի նախագահ

